





14
1544
142



14
1544
142



綿州李雨村著

童山全集

萬卷樓藏板

童山詩集序

天下之理常順而文章恆以逆而成水之就下勢則然也風撓之石矯之迴曲而紋生激盪而濶汎其蹙縮殺疊必有奇峯峭岫出乎其間是殆文章之示象也乎士生早掇科第取富貴終其身偃仰廟廊發為詩文玉節而金和宜為世楷則矣徐按其中則體勢平易雖紆徐淡衍求其感動人之心魄欲置不能者罕矣蓋境順則氣順奇峭之思無由振刷以出也吾友李君雨村生峩眉秀異處卓犖自負於書無所不讀發為詩歌嶽峩磊落肖其為人弱冠中乙科三十而成進士授庶常既而

改官文選主事君素不好吏事獨以翰林爲易讀書既
不得以此終則又往往以詩自雄雖悲詭不形然其中
鬱折往復之致多矣歲己丑遭尊人石亭先生大故先
生爲北路同知攝密雲事其歿也雖由疾病亦有憂患
迫之使然者雨村力疾居喪摒擋後事艱難恒悼半載
之間得詩二百餘首皆以寫其悲哀靡訴之情余三復
其詩泣然閔然而告之曰合觀全集大矣美矣而就其
大指論之改官後工於翰林時近作則又工於改官時
非所謂逆則成文非有無憯不平卽不能出奇以驚世
者耶雨村亦相視而笑以余爲知言嗟乎余之好爲詩

類雨村而處境拂逆視雨村尤甚顧余詩多平易近情
語遠不逮雨村是則撓之掎之蹙縮複疊而不能成文
亦天性所限然也余方將請假南歸雨村亦於秋杪歸
蜀因爲序其詩以志別昔東坡答王定國寄詩深美其
藝之進而云窮人之具將以交割與公余於雨村亦云
然矣己丑夏四月新安愚弟程晉芳序

Blank area with vertical lines for writing.

童山詩集卷一

綿州李調元雨村

戊辰

雜興

衣冠入倮國相驚以為怪繩彼以禮文其苦如縲械人
固安所習改飾終不愛假使我輩倮豈復成人類陶人
使為冶鑄器必不良冶子使為陶瓦合必相妨茅茨與
土階後王無此殿玉杯與象箸前王無此宴所以古聖
人因時隨俗便
人身一小天天道固難曉五官不列眉眉胡王壽考百

體不止面而胡獨要好須胡分男女乳胡分大小耳目
胡不倍手指亦可少何不去開毛亦可添牙爪天道多
遺憾何況人身貌自身尚不知安用叩蒼昊所以性理
書徹底未明了

楚王愛細腰餓死了不畏太真號肥婢臨死猶涕淚無
鹽入齊宮轉取人所棄昭君在漢室反使走胡地有愛
眇目者反怪雙目備有變半面者轉笑全妝累人情如
女色愛憎亦多異無怪歷代來忠姦互倒置

佛氏談因果來世生福地幾見初生人盡記前生事老
子稱太上長生應在世何以血肉軀飛昇不見墜吾儒

慎追遠禮重宗祖祭追封拜墳頭安知魂果至人睡言
小死所異在無氣如與睡真同死亦可不淚

鵲巢而鳩居皆謂鳩不如然亦各有長未可定羸輸鵲
固善營造鳩亦善生雛無巢身可寄無子室空虛一乳
鳩子七問鵲可能乎

牧童有何道黃帝拜問之項橐有何知仲尼以爲師劍
必敵萬人乃可試其利詩必參百家始免後人議自以
爲是者安望傳後世

斥鷃爲鵬笑所爭九萬里使鵬穿叢林或恐不如雉蜉
蟬避雨遷苦爲龍所使令龍穿曲珠或恐遜於蟻物固

各有宜不必兩皆美猿猴善登山鷗鳧工涉水長笑土木偶相爭兩非是

驪龍伏九淵誰敢攫其胡愚夫遭其睡乃得領下珠鷗鳥居海上日與人相嬉智者謀獲之一去不復隨失者多由智得者多由愚

偶聞人不潔無不爭掩鼻不知五穀生皆自糞壤出偶見兒啼聲無不厭且瞠不知百年人俱自孩提成流芳須百世前愆乃可蓋遺臭萬年者恐不如兒輩奈何遂臭夫紛紛史策內

遊山

遊山如讀書一里當一葉山行數百里日與異書接坐令書卷氣充腹復浮頰吐出遊山詩清若風生脅人言我看山胡不攜卷帖雲烟供染翰初不借鼓篋不知讀書人內外同涉躡山乃外之書奇文各領脛書乃內之山挿架仰重疊內外皆有書何用書自挾善讀卽善遊理不隔眉睫譬如多金人飽載馬駝躡豈在露財寶豈不妨盜劫君莫笑出門外書趨蹠君莫笑閉戶內山恣漁獵君看萬卷樓只作萬嶼蝶

蜀樂府十二首

荷池引

爲蜀王近侍嚴蘭珍也蘭珍華陽人父椿茂邑
諸生蘭珍工書法年十六與同邑齊飛鸞許若
瓊李麗華同選入宮甲申十一月賊攻城急蘭
珍投西院荷池死

銀塘昨夜芙蓉泣錦城將染黃巢血一聲鼙鼓動地來
滿宮粉黛無人色妾家華陽絕世姝豆蔻花梢二月初
魯侍吾王供酒翰肯教辱賊佐校書塵土蔽天血流水
惟有荷花矚無滓誓將亭亭不汚身對花先向王前
池水漻漻今幾春夜夜秋風吹白蘋香魂雖杳遺墨在
隻字珍於魏夫人

御溝怨

爲齊飛鸞也甲申十二月朔王同周貴妃白經
端和殿飛鸞躍入御溝死是時又有成都王至
樹至淶同日投宮中八角井死

羣豬進城城南閉城頭大呼屠伯至紛紛宮女出王宮
鼠竄不復分雌雄蜀王已縊端和殿貴妃從死色不變
八角井中二王殉又見御溝鐵女人鐵女人是何名齊
飛鸞面如生可憐身死名不死人傳姓氏留青史向來
奔出誰家女

銀瓶擊

童山詩集

卷一

爲許若瓊也王薨之日賊入宮僭據逆闖王宣
執瓊獻賊僞封皇后夜半宴寢宮呼瓊侍酒酒
酣瓊執席上銀瓶擊獻賊額賊大怒戕瓊右背
瓊以左手搏賊賊又戕左罵不絕口賊衆嚮之
礮車轟轟城門開賊如虓虎四門來黑雲壓頭洒紅雨
哭聲震天門已啓此時阿瓊在何地別藏荆軻抱仇志
宮中歌舞夜偏長恨無七首乘賊睡席上銀瓶當利刀
一瓶擊去腦流膏賊大恚羣賊至刀兵齊下截兩臂雖
折兩臂終完名今日方知許飛瓊

漢殿仙

爲李麗華也麗華幼慧父友許寬義嘗以吳江
月令對華應曰漢殿秋其家因呼爲漢殿仙賊
旣破蜀宮幽鎖密處華絕粒五日不死十二月
六日吞金卒年甫二十歲以上見遂寧張氏闢
幽錄亦軼聞也故歌以紀之
天上結璘奔月女降下人間作如子曾從廣寒宮裏生
誓向逆賊營中死赤眉去黃巾來金粟茹玉顏頰地下
旣無乾淨土仍奔月窟上天去

老神仙

爲陳上慶作也鄧州人初爲塑匠自言從終南

童山詩集卷一
山道士授禁方四頁能為人接骨續肢無不神
效曾為孫可望接活美人又活白賊養子賊中
皆呼為仙獻賊有愛婢曰老脚能掌文書誤刃
洞見臙腹命醫之七日而活賊喜叠几為臺使
登几頂令眾羅拜封為老神仙賊誅後從李定
國至平越病死蜀人劉文李蒞親見之屬方邵
村亭咸為記因歌之

我聞神仙愛官職不聞神仙亦從賊何來塑匠亦稱仙
公然與賊為賓客自言曾到終南山乞得仙書洞裡還
中有禁方纔四頁接骨換肢呼吸間不知何時賊兵至

擄在營中作醫士篋中已起孫美人陣上又活白兒子
三千粉黛列如雲就中老脚能掌文無端遷怒刃傷腹
洞見肝腸賊欲哭呼聲一片傳仙至莫謂我刃鋒不利
半夜纔敷白水膏平明依舊紅妝侍從此賊聲歡沸天
築臺奉拜老神仙萬几叠梯高不墜老神仙名天下傳
如此名醫不醫國却去賊中醫首賊我欲殺仙報蜀仇
惜哉仙死賊亦殛

狗皮道士歌

狗皮道士不知姓名以乞句為生嘗着狗皮學
狗吠故名每侮獻賊賊入成都嘗爛馬作狗吠

賊怒以乃斫之不入彎弓自射之反中賊馬賊
遂避之元旦賊僭登殿受朝賀忽見道士狗皮
執笏立班中令人縛至道士作狗吠則城中狗
皆吠吠聲震天對面不聞人語賊乃退道士亦
不見陳定九鼎魯爲作傳

狗皮道士不知名以皮爲衣狗爲聲乞食成都偶一吠
城中百犬皆吠驚忽聞獻賊前騶至突向馬前作狗吠
賊怒彎弓射不入反中賊馬馬立斃是時獻賊僭稱皇
百官拜賀如朝堂忽見道士立班內狗皮執笏隨班行
獻賊由來狗天子一時百官狗而已道士以狗爲詆諧

反借狗皮整綱紀嗟乎狗皮尙把賊爲戲豈有人皮反
畏避君不見驅賊入蜀楊嗣昌人皮不若狗皮良

青羊宮

傷蜀士也賊詭稱開科用軍法發遣後至者誅
及至盡殺於成都西門外青羊宮凡二萬二千
三百人筆硯堆積如山又開武科取狀元張大
受寵賜無比三日闔門盡誅

文人怪事竟至此二萬秀才同日死宮中筆硯堆如山
門外浣溪血成水玉石不分盡遭戮若比焚坑禍尤酷
卽今元氣雖復還天黯猶聞酸鬼哭富貴如浮雲儒冠

立山詩集 卷一
解誤身君不見當時狀元張大受三日榮華萬年臭

兩橫行

誰家兩橫橫閭里一橫肆行一橫耻冤家狹路忽相逢
血流五步當場死君不見李熊爲盜鄴中豪轉禍爲福
官職高又不見韓信能受跨下辱終拜王侯亨大祿丈
夫只宜五鼎食何須五鼎烹朝廷所需正爾輩安用爲
人報不平方今四海正清宴寶刀不用明如電三橫變
作一忠臣昔年周處是何人

咽嚕曲 并序

頌黃制軍也 咽嚕本音國魯蜀人呼賭錢者

通曰咽嚕皆作平聲如曰辜奴行常帶刀短曰
線雞尾長曰黃鱸尾皆象形而名內分紅黑畫
曰紅錢如剪綵割包之類夜曰黑錢如穿墻鑿
壁之類或三五成羣或百十成黨少則劫奪孤
旅多則抗拒官兵蜀中爲害莫此爲甚非斬草
除根久必蔓延公名廷桂漢軍自公制蜀此輩
斂跡及去無不望公再來也

黃鱸長線雞短青天白日兵戈滿黑錢去紅錢來山橋
野店雞大哀殺人不償命皆曷古名姓夜來假面劫鄉
民平明縣堂充保正刀爲益州劍爲閣天胡不將此輩

童山詩集 卷一
八
截安得再來關內侯盡使帶牛兼佩犢

烏生八九子

烏生八九子啾啾鳴樹巔一子始能飛遶樹爲翩翹衆
子妬先達叨啣進謗言老烏中先入不使棲巢間一朝
不知處沒入青雲端衆子怒且詈不報養母恩那知日
復日衆子不踐言有翼生我身各各爭鵬搏東西紛飛
盡年深竟不還空餘枝上巢風雨日摧殘老烏在其間
悲鳴饑號寒朝來一鳥過視之心爲酸饑爲哺蟲食寒
爲蔽羽翰乃知是前子終始戀本根當年倘不去寧得
身膚完雖然母有託坎壈多憂患嗚呼八九子烏生良

實難

拉馬行

客行至縣城城外聞拉馬云奉上官票行裝且須下縣
堂擊鼓點馬夫縣官排衙吏傳呼里正如狼差如虎馬
瘦如狗客如奴富客競輸錢汝馬暫免牽貧客無錢聊
守坐公文急迫當忍餓却看驛馬肥於羊沙眠草嚙自
徜徉借問此馬誰所鞿但云官府出門用

圈墳嘆

松栢鬱鬱中有墳豐碑隆穹高南村朝來不知誰氏子
買莊恰恰鄰墓門子孫雖貧墓宅在寧肯將墳當田賣

眼看地面屬他人不許麥孟親灑拜道逢官府牽衣哭
官解長繩一丈足縱橫十字套爲圈圈出不許後人贖
君不見寒食家家上塚時烏鴉銜肉啼高枝烏有母兮
枝有本君家亦有塚纍纍

上之回

上之回自秦雍雲君岳祇海工瀆伯厥靈來同百神駢
集太乙既翠羽金支闔竹宮上乃南觀神洲北眺芒嶺
東臨灞澹西望舊灃龍光日浴迫紫舌黃支頭飛鼻飲
咸追風駕霧以朝東星斗交羅光粲粲瞻雲就日來何
從上不回兮心方忡上之回兮樂無窮

巫山高

巫山高高入雲雲中十二峯五色何氤氳琪花玉樹紛
難詳遙見碧城開天閭黃金爲門白玉墻中有雲鬢明
月璫含情弄態如相望亦猶藐姑射出旁飄飄似仙雲
中翔陽臺何山無斜陽爲雲爲雨山之常底事誣山誣
襄王

烏夜啼

團團桐陰綠窻開香闥少婦臨妝臺昨夜夢見征人回
枝枝寒鳥啼不已兩情未訴忽驚起玲瓏亂落淚珠子
問烏知郎歸不歸啞啞似不管是非恰欲打烏鳥已飛

猛虎行

采蕨于山日暮苦饑猛虎當道我不得歸解一再拜涕泣

黃馘骨立膏梁之家而胡不食解二虎曰啞啞所忌爾輩

腐鼠何校鬼攝其氣解三我則已矣母為狐媚南山之南

馮婦且至解四

來日大難

來日大難馬瘦衣單出門何所之撲面風沙寒道逢故

人相對無語車驅竟去泣涕如雨高軒駟馬去者誰昔

年破屋聲嗷嗷我若乘車君戴笠他日相逢任君揖

少年行

馬蹀躞車輾輾紛紛陌上人相逐誰家白面年少郎翩

翩侍從紫遊韁身列羽林建牙纛臨門榮戟生輝光人

生富貴何足羨過眼豪華倏飛電翻雲覆雨事何常生

死炎涼一朝變君不見郭外纍纍何代墳白楊千尺噪

雅翻誰人昨拜千鍾祿還向墳前起大屋

子夜四時歌四首

妾心如柳樹郎心似楊花柳樹長在戶楊花不在家

纖手弄團扇念歡不任口團扇妾不離妾已棄君手

天上會牛女明日仍間隔如何妾與郎不及會七夕

郎從西北來圍鑪暫相戲願郎心常溫莫改寒時意

窾木論

窾木窾木風從中出笙簧笙簧言從口揚窾木尚有因
笙簧不可當初或疎兄弟漸乃離翁孃嗟乎曾參殺人
母反走古今間人只在口

艾如張

雙鳧俱飛欲歸稻池道逢繳弋傷我胸臆鳴鼓澤中不
知何處張弓視鳩雄雞飛去

雨霽懷明經計寧邦

萬安

夜涼如水平池倚檻思君君不知雨漲江頭聲瀕洞
風篩潭面影禱禩幽人祇愛觀周易名士原須讀楚詞

種菜閉門非我事秋來折桂定相期

苦雨行

雲滃深林色如墨勃鳩呼婦林間匿倏爾狂風捲地來
簞笠無功雨似織憶昨蘊隆黑蜨凝共禱田神火螟螣
瓮中蜥蜴擊欲死龍無點滴救生植邇來天漏誠有之
媯皇不補聽其缺田禾皆作浮萍飄禹王何以畫溝洫
陰陽在天雨有數社鬼母乃失其職我雖無田耕石硯
亦有破屋遮寢息書生一命本螻蟻徒穴返遜微物識
願天憫此菜色民撥雲一露青天色我雖餓芋亦何憾
免使窮簷戴盆泣

雨夜和郭秀才 有聲韻

晚來驟雨忽翻盆
悶向糟邱倒一尊
正憶高人居北郭
忽同素友到南村
論詩務使陳言大
酌酒空餘舊釀存
洗淨鉛華出新穎
天公此雨不無恩

計寧邦送木筆盆花

名花結構出天工
蟠就辛夷最鬱葱
作筆他年書澹墨
奪朱此日惡殷紅
王維館裏知誰到
杜甫詩中落已空
獨有好竒老居士
縛毫不令放東風

雨過寧邦覓花歸
栽江漲不得渡
憇曹錫寶妹丈
久待乃得濟暮歸
爲作長句

颺風驟雨間拔木
雷聲萬竅顛坑谷
川河忽作汴河黃
一瀉滔滔無九曲
我辭主人整歸鞵
奚童担花紅滿肩
臨流欲渡不得渡
烟江獨立何茫然
柵木林前柳堤畔
扣門曹子置高宴
飯罷頻遣個人看
猶報洪濤平兩岸
須臾垂龍收雨回
杞柳津邊船始開
一葉飄飄出復沒
風波堆裏如飛來
渾身衣裳濕如洗
歸對妻孥真夢耳
急草新詩代招魂
不覺亟稱水哉水

苦雨二首

如籠小屋似雞埒
又與鳴蛙共一池
老僕披簑煎蠟眼
諸昆著屐擁臯比
移家處處還同蠶
毀室翹翹祇恨鴟

市釀不須嫌味薄醉來亦足舞僛僛

彫零梧葉井成堙竈不聞炊歎濕薪寒到緼袍慙李路
饑無棠粟憶陳臻芭蕉搖去輕如扇荇菜飄來嫩似尊
却看園花無賴甚胭脂抹得更鮮勻

喜晴二首

仍用前韻是日進蔣劉二生未至

失晨雞暗尚於晴早見晴雲落曉池簷影三磚眠野老
履聲一路響隣比黔黔梅雨斑書籠陣陣花風點酒鳴
月色定知今夜好舉杯准擬舞僛僛

剪除藤架使通堦閒看兒曹拾斷薪閑徑祇應來蔣詡
出門竟欲訪劉臻蓉溪客至烹紅鯉絲竹人來饋白粳

數日園林泥不到幾年新綠粉初勻

童山詩集卷二

綿州李調元雨村

巳巳

鹿頭關謁龐靖侯墓祠內並祀武侯

江鎖雙龍合關雄五馬侯益州如肺腑此地小咽喉事
急爭雞口時平失鹿頭至今松栢塚風雨不勝愁
誰言此州小曾有鳳雛來首獻三條計洵非百里才生
無慙驥足死合遣龍陪一自星飛後千山澗水哀

漢大司農秦宓故里

官本司農秩人呼祭酒村兩朝天有姓三造地無存城

郭綿江浸人家洛漲痕永安遺命日應愧此中魂

過新都謁楊文忠公石齋先生及文憲公升菴先生墓有感議大禮事爲作長歌

備禮乃成體嘉靖不信前制禮考書乃知初嘉靖不讀前史書武宗前星旣失耀兄終弟及下明詔旣難隔代考孝宗又難二統逼武廟一時議禮集朝堂俱守定陶與濮王請考孝宗叔興獻皇帝曰嗚朕心傷獨有待對一舉子不與漢哀宋英比請考興獻伯孝宗皇帝曰俞朕心喜可憐衆君子不敵一小人新都朝去位永嘉夕輔臣大禮未成大獄起撼門慟哭在此舉牽裾首輔爲

罪魁遣戍百人子居始濮議諸臣旋賜環惟有金齒終不旋至今文忠及文憲豐碑終見高遺阡閱五百年國已更事久聊作平心論天下豈有無父人况爲天子亦有親興獻旣爲天子父忍使其父爲子臣漢宣不皇父亦嘗考皇孫光武不皇父亦嘗考南頓旣考興獻卽當皇亦猶王季同文王邠王昔稱景泰帝懿文亦得爲康皇譬如遙除官不過追贈諡但當曲憚罔極私無預朝廷大名器所恨考興獻則疑前無孝並嫌皇興獻則疑躋武廟不得世宗延其嗣反名獻皇亂統號舉朝所以共沸騰百官所以愈暴謀世宗亦乏錫類仁銅如元祐

諸黨人璵等輩何足責只為功名臭萬春臭亦難悉
數豐坊又踵武嚴嵩附和號睿宗議禮又用李林甫

雙桂堂楊升菴故宅即今廳署雙桂殆補植也

留耕家世福雙全豈料人闌酒亦闌仕宦從來真傀儡
家山何處望團圞青蛉夢斷啼鴉易金雁魂歸化鶴難
果有堂前雙桂否丹心丹桂定俱丹

平定金川恭紀八首

序

乾隆己巳十三年十一月癸丑 上命大學士

傅恒為經畧督師赴金川軍營十四年正月初

四金川蠻酋沙羅奔郎卡率眾投降奏聞 上

命班師二月丁巳還朝庚午瀛臺賜宴封經畧
大學士傅恒忠勇公提督岳鍾琪封三等威信
公

蠶叢天險控西隅雜谷羌夷種落殊回鶻未通唐職貢
冉駝終入漢輿圖連年議撤金城戍此日重開玉塞圖
聖世羈縻有深意諸戎甘自觸天誅

繩橋窄複正懸兵帶索牽援絕嶺行石壘豎旛蛇有影
礪房吹角鴈無聲邛川雪霽姜維廟瀘水烟生孟獲城
眼見旄頭天際落窮荒極目瘴雲平

羽書飛騎接長安夔道縈迴路百盤誰使行軍殊細柳

遂教對簿緩樓蘭當年構怨哀鍾鄧謂訥親張廣泗此日同謀憶范韓聞道軍前方賜劍應知國法總難寬

何須小醜刻師期自有高牙樹月支十路不需諸葛扇百蠻爭避岳家旗寒侵虎帳傳餐早霧暗龍堆出探遲何處金笳聲倍壯元戎早報獲酋夷

捲甲銜枚度雪山重兵振旅入荒蠻軍聲欲壓沈犀驛虜膽先寒倒馬關洗甲營前星燦燦受降門外月彎彎廟堂早建凌烟閣竚待元戎奏凱還

非關狡窟計終窮原有懸弧在掌中日落紅崖森壁壘風高黑水聚朦朧火驢已見樓梯破流馬何愁棧閣雄

便築三城當絕域降王萬里使車通

岳公奏准出黨填水陸並進金會畏懼乞降

妖狐伏處望嵯峨無復征騎鳥道過已見金戈清大漠

還聞王斧畫沙河張騫槎上葡萄少馬援囊中薏苡多

從此白狼應八貢好將朱鷺譜饒歌

千載聲威感白題九霄相率上丹梯垂楊綠到花卿廡

市杖青連竹女溪外譯初嘗鄆縣酒內蠻先獻普州梨

陽關守吏如相問家在邛崃西復西

綿州越王臺故壘

生為磊落人復遊磊落州不見越王臺但見清江流當年唐帝子錫土守此邱美人捲珠簾笙歌夜未休鳴鸞

忽罷舞江山生暮愁惟有江邊月曾照城上樓杜少陵詩綿州

州府何磊落陸放翁詩磊落人為磊落州

田白埕瀾渡東津

出郭眇遙岑過渡得佳境長風走溪聲落日橫塔影入林路愈細村口光耿耿髣髴別有天鷄犬自問井不見打魚人但見釣魚艇

自東津步至西澗

烟霞何重疊草樹復葱蒨出澗聽萬籟入谷駭百變犬吠隔林聞鳥啼深竹見懸崖暮樵出細逕歸僧慣道心觸幽洞孤請超清院獨往雖暫歡多累恐寡便濯足洗

塵心庶脫流俗牽

遊富樂山

但覺林巒密不知烟霧重緩步入修竹夾道吟長松細鱗漾深澗矯鶴盤蒼穹遙指精舍好遂登最高峯當時龍戰野此地等蒿蓬富樂獨入眼方知使君雄事歷千年劫空餘一畝宮惟有古源泉日夕鳴悲風

由富樂禪林至西山觀宿

微風水際來不覺山色暝遙望檜栢林遂上杉蘿逕禪榻殊清冷空齋愜雲性老僧喜芳談元理滿清聽松濤何處生助此清夜興

西山觀觀石壁所刻揚子雲真像歌

四山冤鳥清晝聞攀藤覓路松顛分中有石像鬚眉古
孳巢書題揚子雲嗟公吾蜀詞壇祖前無相如竟誰伍
惜未抽身居攝年至今後人稱黨羽笑公口吃談非便
我爲公辨當云然當年石牛符命起井邊鬼夢呼天子
市上小兒皆王侯獨君三世官不徙可憐閉戶真泊如
可憐著述甘窮居倘使竄名緣獻匱肯教投閣爲校書
君不見虞帝七首竟無憑漸臺美人呼不磨銅人夜徙
悲長樂衆恩曉望哭延陵奸雄氣焰空復爾藏熱收聲
正謂此早知一跌能赤族悔不來泰太元埋始信蚪螭

騰九閣龍蛇不蟄必滲身跟前桓子真知己身後侯芭
是解人今過西山讀書處令我流連不能去拜罷靈祠
宿鳥吟似訴長歌明我心君不見佐命劉甄何其榮禍
至猶看太白星

庚午

練時日

練時日兆精禋張壇案升柴燔彰畫黻幸蜺幃通肸蠃
晞神休靈來格天香滿紫微開軒星纂儼九霄蠹黃旌
戛雲和鳳笙歌靈來御扶金軒撫天僕揚六鑿駭如舞
翔高壇靈來始羽節弭總容衛靈瑤玕百靈賓鏘玉珮

肅濟濟靈來止駐靈軒黃龍蟠雲亭亭登黝牲達薌蕭
華鐘鏗雷坪坪靈來安陽位美顧華堂色有喜靈之勝
舞羽幢紉蘭芷雲錦裳歡良夜進瓊觴靈來饗流譽光
眷元祐福無疆舉群鸞倏而翔

帝臨

帝臨圓壇肅穆靜對元哉樞紐宅中圖大四序均調風
和萬籟機衡不爽時雍道泰庶彙咸若率土來會陰祇
協贊儼承帝謂神飈既揚籛澤無外含章居貞皇祚允
賴明德維馨崇薦斯在

青陽

青陽在木棣通族出氣始和淖園煦釋物群雍蠢闢包
裹風俗呼吸浸潭旁薄斟酌育微敬始息長祈福羊麥
堪歆衆生欣樂

朱明

朱明御火南訛以平龍星體見斗樞中繩進及天稷雲
漢潛萌羔犢生息澤流石精德懷陰暘鬱陶心凝鷄救
以饗式表虔禱

西顛

西顛行金指隅晷促炙湯下露淳波澄宿水香擢蒨羣
籟振木有懷任象黹斂成孰雲物觀美允景靈肅麻犬

童山詩集卷二
斯陳以介景福

元冥

元冥正水履長在御司智莅坎星迴晷度日至峻狼北
陸凝互沉潭見心雪霜老樹八蜡順成農穀息務彘黍
是薦來歲允祚

遊雲龍山

雨歇數峯清斜陽下喬木谿西聞暗泉夜氣侵叢竹何
人嘯空林冷然出幽谷
上山賦採薇携鋤過別墅薄靄遙岡來蒼然下平楚時
聞人語聲不見人行處

支筇步清溪峯嵐出林表空山一葉聞驚起雙栖鳥飄
然下層巔前村樹煙渺

松風谷口來吹客上峯頂紺宇出林端遂達招提境疎
鐘時一聲微見寺燈耿

谿迴樹色濃日暝澗光暮蒼然白雲歸遮斷前山路時
有採樵人長歌隔林去

苔華石氣清雲砌寒蟲響古道瀑侵衣雲洞坐幽敞山
深夜不眠孤月樹杪上

辛未

八陣圖歌

彌牟鎮作

重刊詩集卷二
有客騎馬來新都逢人指點說彌牟森然魄動下馬拜
武侯八陣遺荒墟緬古軒皇授神術布軸抗衡森紀律
卦義微叅數更靈井字成形制尤密蚩尤殲戮著奇功
千載獨傳諸葛公五行操算由天授六花變幻非人工
是日高壘狐兔嘯四面林樞鷲鶴叫車廂折衝烏翔火
飛翼浮沮龍騰跳橫天鶴列儼成行匝地魚麗不可釣
憶昨三聘翻然悔茅廬本爲蒼生起身比管樂殆過之
心折關張良有以圖成犄角誰能攻綸巾羽扇何從容
畏蜀當年同畏虎得狗如今羨得龍惜哉出師方盡瘁
內蠻跳跋分其勢車蒙未得驅中原鋸齒空教吞虜地

事壞誰當挽天迴心傷不獨指星墜至今怒氣鬱沙麓
屢遭剗平仍磔卓戰場殘廢爲民田徃徃犁邊拾古鏃
月黑時聞金鼓聲天陰疑有鬼神哭君不見棋盤市夔
州城今人不少能兵者黑白杯中總不清

將進酒

我不如張校尉李輕車博取封侯高建牙復不如談天
衍彫龍甕手攔相印爲說客不文不武究何成旅進旅
退終無益東家車馬闐門前西家歌吹聲沸天壺中有
酒且須酌莫教酒盡求人憐華亭鶴唳悔何晚咸陽牽
犬事不返地下應無賣酒墟世間何事擎空殘人心如

面安可窺旁人側日君不知大江流水有窮日白衣蒼
狗無盡時我當酌君當斟呼牛呼馬隨君意清聖濁賢
知我心

結交行

我生豈不願安貧捉衿見用羞煞人我生豈不願求富
金穴銅陵不牢固我聞士可殺而不可辱寧以直禍無
枉福君不見伯龍欲爲卜一方有鬼撫掌笑其旁

君馬黃

君馬黃我馬不如君馬良金羈馳紫陌玉勒點秋霜朝
馳崑崙夜幽燕箭雲一旦飛上天天門九重多罡風忽

然吹落塵埃中孫揚掩面救不得韓幹欲畫難爲工回
看我馬非龍驤徐徐緩步遵平康君馬黃君馬不如我
馬良

丈夫行

丈夫持此身七尺安能終日心偏仄何不躍上天衢游
汗漫九垓馳八極不然萬里邊庭開請纓仗劍從軍臺
龜茲國邊拍騎去烏思藏裏斫頭回胡爲跼蹐藕穴裏
出亦不喜入不喜平生事業竟何成卑哉著書漆公子

美人行

青春華宴張翠帷吳姬越女裁冰絲玉顏纖手傾玻瓈

珠翹摘阮爲君娛爲君娛君莫辭君莫辭妾當舞君不見美人轉瞬亦黃土

壬申

田家四時雜興

春至催耕鳴薄言向田里戒婦預爲黍呼兒先載耜荷鋤帶晨出晚歸泥滿趾田礪藉人力糞壤須肥美眷言興農事努力自茲始
遠屋桑柘稠掩蔭虛落翠新麥已登場餘蠶猶待飼青秧及時移田婦攜餉至杯盤俱瓦缶初不擇精緻高樹席草茵壠上各飽醉睡倒不自知安知天與地

種稻已成穗黃雲倒平原村村耒板急人牛一時喧腰鎌旣穫稭碌碌卧場園得穀甫入廩科吏夜打門丁男輸租回優游且晚飧

嚴冬百草枯鄰里及閑暇田家重農隙翁媪相邀迂列坐酒三巡或起四五謝盤薦園中蔬壺傾家甕醅酣呼遞相酬笑語雜悲咤客散送柴門月色耿涼夜

成都雜詩

春到城頭花木饒雨餘始覺鳥聲囂旅人飯罷渾無事閑上東門萬里橋

當年遣祭望旌旄聖主賢臣異代遭金馬坊前空片石

重刊詩集卷二
鄉人猶自說王褒

市橋西畔相如宅滌器當時果有無今日琴臺生綠草
誰家少婦復當爐

校書投閣事堪哀想見侯芭問字來我欲墨池尋舊蹟
縣廳深閉叩難開

賣卜垂簾雜市闌君平遺跡已摧殘千秋一片支機石
今作巫家黑虎壇

紛紛割據竟何存天府休言控劍門試向籌邊樓上望
暮雲低處李雄墳

烏鴉啄肉紙飛灰城裏家家祭掃回日暮烟村人不見

薛濤墓上一花開

青石橋訪韓三

把袂尋春一騎乘管絃深院許同登地當青石東三巷
人任紅樓第二層曲誤周郎還屢顧句敲賈島輒蒙稱
年來自笑頹唐甚爛醉狂歌漸不能

環翠軒

偶從環翠軒中坐無數琅玕盡遶軒雲氣欲來庭院暗
雨聲先向竹林喧天光不照因枝蔽地爪頻爭爲葉繁
我本書生思靜默幽禽何事獨多言

梔子花

此樹家家種非蘭亦號林不風香透鼻有口贈同心花
賤何須賣苞含便可簪曉來猶有露着屣是誰尋

佛桑

洋外扶桑樹川中木槿花開當五六月艷照兩三家慣
作風前墜翻因雨後斜愁雲能護惜惟見海東霞

南村曉行

白雲高捲碧天飛曉起風涼雨亦稀烟際早聞人叱犢
炊餘時聽婦呼豨花梢炯炯晨曦照草色瀼瀼夜露晞
獨有庭前紫荆樹屢因分析少光輝

雲龍山

雲龍葱鬱處冢樹擁烟鬟江似弓絃直山隨扁担灣地
因兵燹失天念祖功還試看松楸宅牛眠不足攀

喜琛芳昆仲至

陋巷原無過客騶窮居忽得二難遊風搖竹尾鳥猶宿
日落花心蝶尚留到處身如巢幕燕相逢心似浴波鷗
曾聞空谷楚然喜今日同君頗似不

贈蔡製亭

錦生秀才

門前剝啄騎頻嘶早有高人控短藜翠竹環軒新雨過
綠槐遮巷夕陽低羣空伯樂知良馬舞罷劉琨為聽鷄
此日一尊聊復醉人間憂樂總難齊

蛺蝶花

蛺蝶來何處花名偶混淆紅顏時誤撲黃鳥或偷捎肯
入荈周夢難同魏子嘲最憐風雨猛猶自占柔梢

童山詩集卷三

綿州李調元雨村

癸酉

清明在成都作

清明郭外柳鬢鬢車馬如雲有墮簪莫向碧雞坊裏去
遊人多在百花潭

將之姚江留別范大

士顛 鞏大 建昌

萬里為官累不輕舉家陬吉起綿城心如灘急船初動
眼看山飛浪欲迎不共蝸居角蠻觸要從鰲背上蓬瀛
此行頗慰桑弧志負米兼懷負笈情

早發涪江

清江滴空翠曉晚渾不辨月光水面微樹色烟中見舟
 人貴早起開柁迅如箭晨興未盥沐先戒東棕薦以舟子
薦為不敢遽開蓬但聞槳聲濺川江使船皆用槳奔浪聽漸近
 候若已後殿起來問水程已過幾州縣一葉凌滄波千
 里穿白練萬山若奔馬飛騰捷驚電年輕事未更江神
 莫吾玩

渝州登朝天城樓

五鼓城頭畫角催四山雲霧黯然開三江蜀艇隨風下
 萬里吳船捲雪來剩有小舟來賣酒更無詩客共銜杯

少年壯志無人識袖手寒天寂寞回

舟中二首

扁舟一葉輕濛濛晚烟裏白鳥溯江飛時時點秋水
 有寺懸崖巖蒼然雲滿樹忽聞清嘒聲不知寺何處

晚泊忠州

雨不放山出雲偏隨塚開江依巴字走峯學篆文迴水
 冷光難定山空響易哀孤舟泊何處曾記樂天來

巫山縣

小小巫山縣雲峯密似麻天寬才一線地仄控三巴瀑
 掛山山樹溪流處處花瞿塘天下險莫更說褒斜

詩集卷三
二
謁杜少陵祠

飄泊誰爲浩蕩遊當年杜老此淹留一朝詩史爲唐作
萬丈文光向蜀留風雨茅祠仍見拔雲烟灑宅尙含愁
艱難我亦棲遲久試問秋懷得似不

歸州謁三閭大夫廟

汨羅遺蹟峽江頭欲賦懷沙淚已流腸斷女嬃空見詈
數窮詹尹復何尤祇今三戶餘秋草剩有千山送客舟
愁絕洛陽南浦上年年村若老芳洲

荊州

楚水瀾瀾下巫雲蕩蕩開天浮烟樹去日帶早帆來

下渚宮遠人喧沙市迴城邊空幕府無復舊軍臺
荆門雄七澤峽口控三巴灘勢拖狼尾關形扼虎牙荒
原淪戰骨古木帶昏鴉漫話孫劉借如今總一家

黃州晚泊

赤壁煙初合烏林月欲升烏投遙岸樹人語隔江燈夢
去家疑近愁來枕自憑天涯遊子意寒夜總難勝

夜聞江上吹笛

兩岸風濤靜中天月影流梅花何處落一半在孤舟
大風渡鄱陽湖

平生浩蕩不羈志忽有奇愁眼底來日湧波濤連地動

五言集卷二
風驅檣櫓自天迴山趨湓口千層合水遶潯陽萬里開
莫道天涯便飄泊此中還有濟川才

信州早發

解纜月初墮滿江烟霧流眠鷗知讓客飛去別灘頭

七里瀨

烟江漁互唱小艇人相語峯回不見峯路轉疑無路遙
見山下人漸入山中去

會稽懷古

千巖萬壑越山川到此欣然欲學仙我未功成少西子
那能便泛五湖船

甲戌

鳳山精舍

淨室朝來別樣清無窮幽趣眼中生一花開處蝶雙去
萬竹叢中鳥數聲沙觜樹排貽畫譜山腰田界設棋枰
平生酷有烟霞癖恐類巢由便不情

登寧波城樓

雉堞凌雲脚下開鯨波帶日島邊迴江中船出海中去
洋外帆從天外來地近東溟先見日雲垂南浦忽聞雷
不知何處蓬萊是遙看滄滄貝闕開

題俞醇六夫子小照

曠達如夫子柴門半結蘿師家鄞縣城南十里有田鶴頭臨江背山村景甚幽鶴
馴隨意放鷗靜與心和但有通儒至全無俗客過草生
青靄滿松老白雲多是竹邀同看逢花必共哦從遊欣
粵下歸詠敢辭歌

餘姚蓮池夏日晚坐

納涼何處好堂後有紅蓮草裏青蛙國池中白鷺天最
宜蒲扇坐恰稱竹床眠又見奚童報書燈滿院懸

謁曹娥廡

哭父沂江湄投江竟得屍名齊列女傳孝重外孫碑風
過猶聞泣雲行似見隨英靈今在否千古愧鬚眉

蠟梅

東風昨夜有機事開破封書第一九却被蜜蜂漏消息
先差蠟鳳報衙官枝枝蕊似雕黃玉陣陣香疑麝紫檀
道是梅花君不信如何臘月並衝寒

二月二日孝廉施樂莘禮畔同遊西湖二首

不因攜酒到湖邊誰識東風滿畫船燕剪分開紅杏雨
鷺梭穿破綠楊烟山如屏幃雲中展天似玻璃水底懸
却笑香山老居士風流早占大蘇先

十里湖光一望遙無邊春色向人撩僧言攜鶴來三竺
客約聽鶯去六橋蒲葦有聲漁艇去芡菱無路酒船招

數聲玉笛人何處曲院深荷有蕩橈

同汪孝臣張斐成泛舟西湖四首

新晴慣聽鳥聲交載得歌吹綠水均驚起沙邊雙白鷺

一齊飛上杏花梢

誰家小閣傍山斜屋角桃花間李花春色壓簾門巷寂

鶯啼入隔墻家

半湖飛霧半遊塵日色山光總是春忽聽菰蒲船去疾

放歌知是採蓮人

漁人舟過水風腥細雨斜收柳色晴水上樓臺回望遠

斷虹多在別溪明

汪張二君餘姚慕友也孝臣詩題長白有遊天台集斐成上書為先

君寫刻治姚紀畧二卷

丙子

常州道中

鎮日只居水今朝始見峯雙鳩烟外樹孤鶴雨中松小市人聲雜高城返照重惠山何處是杳杳一聲鐘

丹徒縣

問路丹徒縣雲帆第幾灣風來潮似漲日落岸如山海燕銜花過沙鷗傍草閑江南真可樂竟住未須還

邳縣

曠野麥苗清楊花撲路塵迎人雙雀墜失伴一驢鳴地

豈峨眉近山如鳳翅迎青帘誇酒好細買一壺傾

武功道中

高原秋雨後古縣夕陽邊
牛自眠桑下人多在麥田
一村鴉點點幾處水涓涓
更向終南望天梯莫可緣

夜宿寧羌州

萬壑千巖禪蕭條斗大城
三更驚虎入四面盡猿聲
雨驟林先嘯風狂澗亦鳴
曉來山水漲何處問前程

朝天關登舟至廣元午炊晚至昭化縣宿道中得

絕句四首

抖擻衣間萬斛塵今朝見水倍精神
我聞頂有仙人出

疑是桃源欲問津

山神知我愛看山雨洗諸峯獻好顏
惟有白雲偏不肯只教窈窕露雙鬟

石巉巖處是龍門上有雕鐫萬世尊
千佛名經龍定許莫令燒尾却回奔

嘉陵漁父水中居偶得嘉州丙穴魚
我道不如縱他去爲儂遠寄越中書

榜發下第買舟將南諸同人攜酒餞行
留詩作別纔得歸來又買舟相攜話別
各言愁一時氣味直如醉千古文章肯
類優楓葉初紅是新染蕉心含綠頗全抽

他年伯樂如垂顧，看我來修五鳳樓。

將復至浙留別唐堯春

樂宇

行李依然逐逝波，年年爲客走關河。黯然一別魂銷矣，去也相看喚奈何。世上憐才休恨少，平生失學本來多。天公有意君知否，大器先須小折磨。

潼川夜泊

荻蘆花老撲船窗，信口巴歌不改腔。多謝橘亭山下月，伴人今夜宿涪江。

夜泊巫山

自入巫山縣，生涯總是灘。一江吞石怒，萬樹入山寒。茶

老忙瘦婦城孤臥，縣官高堂門尚倚。旅夢敢云安。

峽中二首用范石湖韻

峽山江之濱，嵯峨疊亂石。怪狀難殫述，醜態恣驚啞。赤比牛火紅，魃類鼠膠漆。攢疑蛤殼聚，脫似龜背坼。其高若垣墉，其牢若瓴甃。或似奮鯨鬣，又如曝鱗鬣。倒垂掛霜蛻，壁立支雲錫。霞蓋朱紱縈，嵐染黃裳襲。蹲踞虎豹威，杙枿熊羆力。班班鸚鵡眼，細細蜿蜒跡。覩茲光怪姿，窮我冥搜癖。大哉造化功，狀此崦嵫色。經紀有營腴，嘯吼肆縱擊。厥初誰搏沙，弄嬉空潭側。巧力多勞疾，鍛此千片碧。無乃神禹功，譜此大荒籍。平生多倦遊，竒石未

盡覲鳩來巫峽中刺眼紛如積我家南村南舊有三畝
宅縱有竹林趣未稱泉石國何當掬玲瓏歸家細鍊液
顧猶在孤舟遠作天涯客

平波行峽底遇石則斗變盡日防暗灘盤渦遞隱見始
覺中流靜蕩駭忽綠間少頃便墳起旋繞復橫貫初如
拖青紫漸似翻白練謾謾疑湯沸齒齒若磨旋鯨牙吐
浮沫魚尾掉碧暈山飛岸忽高地動水相眩平鋪若熨
帖上冲忽噴噴轉瞬成頰窠盪摩作股抃突然殊叵測
安定乃慚汗舟子持篙立勇若操水戰撓折還衝突蓬
飛怕終轉捩柁幾併入招竿幸未斷中窪更拿檝半陷

尤加牽喧呼捷過雨顧盼快驚電愀愁傾跌屣防維設
法徧我來立船頭常有浪沃面不少扣舷歌翻笑客舟
亂陽侯量自容豈便憎吾慢設機恐人心無乃太相玩
吾壁不可投按劍力猶健

昔年過琵琶亭籬內有主人相迎款洽備至今再
過之邈若矣爲之憮然

昔年江畔維舟話今日亭邊獨再經只有垂楊無勢利
向人猶自眼垂青

神鴉行

富池廟祀西陵守廟前神鴉傳已久往來索食不避人

拋接高低皆到口我怪其異欲彈射其奈黨羽紛前後
人言此是甘公魂精靈不可機械取我思將軍英烈氣
關公尚避曹瞞走安能幻作羽毛身嘖嘖向人求肉酒
嗟爾神鴉應知足藉賴靈威惠實厚君不見權門索賂
多走狗憑仗威福無不有

甘將軍廟

名將為神信有靈當年戰地血猶腥營前鼓吹聲方厲
陣上傳杯酒未醒日漾銀濤疑被繡風搖鐵馬似聞鈴
代函古誼今寥落空望遺威奠醪醞

曾肅墓

在鎮江府城東

奮武遺墟卧石麟江東霸業已沉湮晚年空笑求三郡
早歲曾經指一圍山色凝愁連北固水聲流恨入西鄰

借荆能落曹公筆切勿輕看冢內人

吳志本傳後備諸京見權求都督荆

州惟肅勸權借之以取曹公公聞權以上地業供一方作書落筆於地

金陵懷古

大江劃斷兩邊天幾度臨江意黯然折屐至今思謝傅
投鞭終古笑符堅雪消水榭聞吹笛日落新林有渡船
試問從前賦詞客誰能寫盡六朝煙

登燕子磯

紺宇凌霞不數重迴欄已上最高峯江邊一雁來殘浦

城上千鴉亂夕春靄靄黃拖淮岸柳濛濛綠滿孝陵松
劫灰白首關天數請聽寒林午夜鐘

金山

自是人間第一山孤峰湧出亂流間瓊樓倒映波中影
玉塔高盤水底鬢吳楚萬家歸掌上江淮兩岸落眉彎
停舟漸俟風濤息許看帆檣歷歷還

楓橋夜泊

初月上平林微風動高樹驚起沙上禽飛過楓橋去

錢塘懷古

宋家事業已全銷漫把餘杭說故朝江上只應寒月照

湖邊偏見暮雲饒王師不抵黃龍府帝子空餘白馬潮
日落諸陵何處是冬青樹老雨瀟瀟

弄珠樓

畫欄無際俯沙洲樹色沿郊一望收幾處鐘聲浮綠浦
誰家笛吹咽紅樓蛤非如蚿時時有蛙亦名雞頓頓羞
向晚湖風促歸去滿船明月漫相留

題馮孝子太行扶襯圖

奉大人命

太行九折古羊腸孝子從來此勒韉長恐登危兼服闋
何堪扶襯更他鄉天寒瀟鬼啼山底日落林烏泣道旁
罔極深恩何處報此圖休遣挂吾堂

硤石舟中

綠野秧初遍青堤荻正生方疑一水狹忽見兩峰橫日
落樹無影風來浪有聲海昌何處是早見一拳城

海昌望海

雲與地相接水將天欲吞雙輪浸日月一色混乾坤烏
嶼竟無影波濤畧有痕平生夸海口到此笑吾言

嘉興逢汪大孝臣以遊天台詩賦見示時余將歸

劍南作長歌志別

憶昨同君太湖醉狂歌大叫姑蘓市鶴澗搖船鄧尉山
虎邱走馬靈巖寺春光淡沱酒盞濃鞭絲帽影隨匆匆

浮雲聚散不復問逐流縹緲分西東我歸西蜀還飄泊
君向東甌更蕭索天台勝景誰能探劉阮桃花同此樂
茲山聳翠東南雄赤城瀑布垂長虹當年登高作詞賦
中興只數孫興公君家詩學冠江浙氣壓滄溟前無伍
括蒼洞口高題名桐栢山頭訪前古樵李城邊日欲斜
巷北逢君坐酒家興酣示我紀遊什句句仍帶山中霞
咫尺仙山不得上觀此令我生惆悵幾時重訪海門山
醴泉瑤草知無恙明朝一葦返家鄉分手無端淚幾行
極目江湖春水白側身天地暮雲黃

除夕

童山詩集卷三
歲華已去不能招又見春光在樹條
淡白梅花先索笑
嫩黃楊柳漸伸腰
人情念舊還如昨
世事翻新祇隔朝
把酒圍爐度今夕
好將風雪壓寒宵

童山詩集卷四

綿州李調元雨村

丁丑

觀繩妓歌

在錢香樹先生座上作

平場如削城西隅
長繩挂竿尋丈餘
美人捲袖向空擲
觀者如堵爭喧呼
一髮千鈞等兒戲
弓鞋來往如平地
乍驚波上洛神遊
却訝樓頭綠珠墜
游絲裊裊動長索
應是五銖仙體著
翻身忽躍入雲霄
但聞環珮風中落
別有循環姊妹行
掣電流星矐睽光
閃然欲下不肯下
纖腰倒挂學垂楊
舞罷人看傾國姿
粉汗釵斜態亦奇

童山詩集 卷四
數聲雨點催花鼓六街風細裙帶垂樹影西斜日卓午
坐見此伎世無伍乃知人間蹈險人挹其容顏正媚嫵
登弄珠樓
小樓四面挹風清真箇船從鏡裏行漁港雨過新水漲
鷗汀月落暮潮生淡黃山色螺千點深綠園林鳥一鳴
便欲浮家此中住只愁尚自絆浮名

題錢舜舉符堅訪鳩摩羅什圖

爲查梧岡先生作

龍驤將軍何僕僕朱衣赤冠來曲沃天生背帶篆文來
屢向瞿曇問圓覺明星昨躍集靈臺主有賢臣外國來
道安雖至何曾聽呂將尋師竟不廻豈知白日浮雲變

甲申不見光明殿佛法如天救不得尾長翼短空復嘆
當時誰歌阿得脂魚羊食人無復遺新平寺前成一夢
至今徒見畫鬚眉錢郎作畫工染翰先生什襲邀同看
當年意氣欲臨江畢竟何嘗登彼岸我來拂絹寫新詩
對畫還抒送難詞請詢靜理旃檀日可悔馳驅中國時

謁張中丞許侍御雙忠祠

在海寧縣

從來圍城攻既久析骸易子古亦有不聞食及三萬人
人肉食盡仍死守死守者誰許與張戮力同心保睢陽
已將愛妾饗軍士更無雀鼠充饑腸氣吞胡虜聲碎齒
望斷官軍血裂皆可憐南八真男兒恨煞進明仇未洗

吁嗟南人不須悲坐視不救誠有之當年執政多左祖
莫恨進明恨房琯

觀錢塘潮歌

八月十五錢塘潮吳儂拍手呼相招士女雜坐列城下
人聲反比潮聲高江頭日上潮未起漁子拿舟泊沙嘴
笳鼓乍鳴人競看一齊東向滄溟指忽聞江上聲如雷
迢迢一線海門開萬馬奔騰自天下羣龍踏跳隨波來
潮頭十丈飛霜霰冰氣橫空撲人面天爲破碎城爲搖
百萬貔貅初罷戰迢遞不聞市聲死羣兒夸強弄潮水
小舸顛簸似浮萍一時出沒烟波裏我是人海中一粟

觀此目眩身爲縮明朝風靜渡錢塘猶恐再遇靈胥毒

相傳潮神
爲伍子胥

新春苦雪次陸漁六 宙冲韻贈天寧寺僧

旅舍春寒苦不禁門前活水又成冰梅邊載酒方思客
竹裏烹茶恰遇僧萬里思歸歸未得一年春好好何曾
連朝擬著遊山屐塞道泥濘應且憎

將歸劍南之鄴別俞醉六師 經

杖履春風坐有年擔囊行色又蒼然後堂此日辭張禹
前帳當時授鄭元蜀道如天雲渺渺吳船連月雨綿綿
聞雞起舞尋常事肯讓加鞭祖述先

過菱湖訪費雲軒先生 元龍山莊先生官綿時余
受知屢試第一
蒼雪最深處菱湖又一村
平田春水岸小艇夕陽門
舊忝後堂客新嘗若下尊
十年深仰止今始入龍門

嘉禾留別漁六

君知我欲歸送我江南路
感君纏綿意為君且遲顧
于役既有年歸思今始慰
不辭道阻長眷此他山助
關河一以隔後會知何處
森森水波雲離離長堤樹
相看兩無言分手自茲去

別烟雨樓

鴛鴦湖上一飛樓得荷同人十日留
此後聊同魚艇散

何時再與酒船浮
喚人有意惟黃鳥
對我無心是白鷗
囑咐磯邊鰲莫釣
會乘烟雨占渠頭
樓下有鰲磯

京口阻風

心擬羽無阻身偏風
兒稽夢中如有翼
飛過大江西

遊金山寺

自我身為吳越客
揚子呼渡三揚帆
六年未著登山屐
行程牽迫如羈銜
金山咫尺不得上
寸心自愧知愚凡
搗來鐵甕城邊住
浪打堅城如鼓儻
詰朝塔鈴似招我
好語邀上金碧巖
興來性命誰復顧
相攜主僕三人咸
須與輕舸抵山脚
老僧邀我言喃喃
引路沙彌捷于兔

轉灣抹角真秋冕我本遊山非事佛不用擊磬開經函
飛磴凌墟上高頂縈迴紺宇藏岑巒尖峯萬仞雲可握
禪房一徑花光緘是時炎天正初伏火雲肆兀威光巖
塔高不上恐喘汗但看石洞爭嶽嶽妙高臺路何斗絕
堞堞萬古窮雕剝古來勝景此爲最不復畏暑窮其巖
靈境覽盡須歸去緩步肩披輕葛衫前此老僧更相送
廣泉亦受真貪饒同行各鬪登山健笑謂誰如矍鑠
中流復見江豚拜浪花滾起海鳥鷗回看壁立飛霞散
邈乎巧錯天工鑿

遊平山堂

一路山低水亦低畫橋多與畫樓齊誰家攜妓歌聲沸
獨自尋鶯柳影迷隋苑何須追往事蘇祠難與續吟題
老僧問我來何地在蜀岡西更在西

謁穎考叔祠

彼狡今何在孤祠穎水濱已悲嘗食母偏隕拔旗身虛
閣松聲怒頰牆竹色新春秋開卷看第一好純臣

早行汝州道中二首

雲籠遠樹暗日照亂峯開鴉鵲驚飛去牛羊遍野來
漸覺蒸胸熱全無撲面風馬行山色裡人在綠陰中

華嶽

峒峒西岳竦一一衆峰奇洗頭遙見女拱立果如兒烟
鎖陳搏室雲開武帝祠峯巔如果到何必涕漣漣

褒城縣

秦棧西將盡褒斜北向橫三川餘故國一笑果傾城昔
獻龍萊種今遺瘦婦倉雞頭何嗚吼莫作牝雞鳴

費禕墓

奉使伊誰不辱君惟君無負股肱臣鹿車載駕真名士
虎帳彈棋信可人一自北邙同寂寞至今西土遂沉淪
當時望氣何人識千載同聲只郭循

試畢仍歸鶴鶴寺

歸山重掃讀書床一路寒山木葉黃遊浙有師皆老宿
歸川無試不高庠掃窓已見蛛懸網翻益先看鼠自忙

一秀才回詩已貴吟箋才寫被人藏向補茂考例附三

高等史學臺洗馬諱貽謨問知從錢香樹受業謂諸生

曰吾考蜀三年今始見一秀才詩字文可稱三絕也即

書院耕業

鶴鶴寺夜多不寐有懷餘姚張淳初義年茂才卻

二雲晉潘平湖沈雲椒初秀水錢受之受藪兩中

叢林盡是一枯叢不盡寒山畏風無故忽鳴驚月鵲
有時高叫度雲鴻南邦故友空相憶西蜀人才孰與同

歸山詩集

正在夢中雞喚醒起來無處寄詩筒

總督黃廷桂纂通志誤引蜀都賦土產而牽連疇

區二字未刪故以詩笑之

剝皮纂通志教人捲地皮如何疇區受與塊欲鞭之

禹碑歌 效楊升菴體

我聞神禹隨山紀刊楮立碑响嘯端不衰天假神權收
玉册太靈寶洞雄南岬龍文蠕蠕勢萬丈祝融凌炎噴
生煨退之開荒始搜得石稟騰擲悲聲齟嶸嶮半空稀
草木紫殿高聳迎晨赧星黏天在近可摘靈風落帽披
鬢影窮追夏后登履跡茸茸蒙塞封谿衍鸞颯風泊不

知處空想倒薤交萌芽後來踵武推九叔金石考古探
幽遐覩縷銘彙並敦鼎細及釜鬲親捫搥獨於靈臺笑
荒怪危崖踏蘚空喘牙晦翁繼亦登南岳委曲仄逕尋
紆蛇更借張子蠟山屐石觜積鐵橫枒杈悵望神踪不
可到得非闕壑杉蘿遮吾蜀升菴最好事天根海窟收
奇葩親云傳自嶽麓院季文攜得從長沙嗟余生晚見
益隘斷縑苦好如啖痂螺書皓屈形曩曩蠲殼篆繡堆
礮啞鋒銛森森起鱗脊枯藤裊裊纏林榭蝶芒豎立外
稜露蟲蝕剝落中剝窪憶昔洪荒極鼈抃巢居黎庶如
棲鴉羽淵愁見黃能化過門不恤兒啼家虞余繡衣備

使令楫楸標軌襄重華鴻濛幽窘犁婁殪支祁伏鎖潛
深涯遍歷元趾功底定盡力溝洫懲驕奢蒼水披函將
帝旨元圭錫命欽拜嘉盤石屹立垂萬古平城括命非
誕誇蟠光黑字雲如漆青尼古印伴杓窳黠蹟風雷走
呵護猗猗巨掌相孤擎何物道人窺此石剝落古碣澁
流蝸君不見宣王獵碣置孔廟商代銅盤歸官衙從來
神物有時出何事聚訟紛如麻矧此深藏靈峙室創獲
尤當珍惜加奇文欲辨已箝口技癢安得麻姑爬第恐
精英忌洩露朝夕變化隨烟霞要當斷骨煩巧匠卵汁
拓本瑩無瑕寶以細練裊玳瑁金題玉躡籠灑紗興來

秃筆應滿瓮看掃盈案龜文斜

青羊宮觀銅鼎歌

我性癖古過米芾洗眼不見寶晉齋青羊銅鼎饒古刻
銷沉尚未寒灰埋老僧邀我方丈坐捧出未示磨揩
寶光逼我不敢近起視照日持當堵方如簞簞底如鬲
緣尻凹凸形葦裊初疑浮河曝日龜又似迴立當風駟
團團菌蠢脹腹豕縮縮負殼垂涎蝸糝糊細篆半磨滅
歲月討論煩吾儕老僧對我增感喟爲談瑣事供嘖唾
云昔法祖渡南海艤舟爨鬻留江淮沙邊夜氣貫牛斗
漁網拾得浮攬簿河伯出獻老蛟怒江湖颯作風潏潏

一自攜歸伴孟鉢萬古留鎮相傳皆此地兵燹幾過眼
戰馬蹂躪時填街在年流賊肆屠戮計簿草殺攢鞞
蜀宮圖書付灰燼血染城郭擄其姓錦官城頭夜烏叫
青羊筆硯堆枯骸浮屠村舍俱瓦礫兵民百萬爲狼豺
此時寶鼎誰持護得非鬼力神所差至今禮佛空王殿
古韻往往鐘磬諧此語荒唐出處怪我聞頓觸據古懷
在昔黃帝迎胡髯蚩尤作象形徘徊後來荆山九牧貢
鍊出五色爭神媧湯鼎爛石旱可祝玉璜出渭波搖颿
汾陰射庶漢武祭百夫扛損相擔挨是鼎于中豈其一
辟邪定可驅厲疾不爾何爲百遭毀雲覆翻見龍甲排

廬江獻後鄭衆死悔不讀書如高柴市兒何知寶康瓠
只解屬屨調珍鮭有緣却伴清淨室松月夜照門常闔
爲君走筆賦始末冥搜險語文多俳向守環堵安睹此
真成井底公孫蛙翻然却下林巒去猶見葱葱山氣佳
此鼎不載金石錄著述安得無離佩何當遍覓名山跡
扁舟一棹天之涯

再過楊升菴墓有感

有人不知相國名無人不識狀元塋狀元謫死永昌戍
相國碑高新都城當時議禮誰爲主璉萼逢君爲首輔
撼門一慟震闕廷至今御河白虹吐大禮未定身先危

杖之不死神鬼持插花盤髻粉傳面醉來裙衫當臨池
可憐一字千金直急付裝潢尚難得百峒獐獠皆知名
九重虎豹竟不識丹鉛錄比離騷詞有明博學無與媿
蜀人固自例遣謫潮陽儋耳無此悲至今行客墓前揖
水聲猶似向人泣試哦海畔孤臣詩不覺淚下如縷縻

古劍行

夜來雷雨吼飛泉鋒芒上與星斗躔
揭朝放出琉璃匣青霜一道翀雲烟
我聞昆吾玉能斷又聞武庫遭火變
平生膽氣不解柔天生剛骨神鬼愁
何須太阿夸往古石函遠出豐城土
但令有人加拂拭猶擬呼龍夜行雨

灌園

不過數弓地能教百產生花儲粟粟種樹帶石瓜
名蜂以鼻爲目蟬將翼作聲閑來無所事抱甕圃中行

飲何文淵前輩達者堂

十年不登達者堂今日重瞻玳瑁梁
老人開門欣相見坐我廣厦斲簞牀
鞠躬先執弟子禮後序寒暑增慨慷
問答未已羅酒漿鼎列炙膾盤糟觔我抱脾
病久節飲夙凜婦戒怡然忘譬如猩猩最善醉
始則相戒終相嘗眼花大地旋如磨遽然一枕無何鄉
覺來胡蝶紛不見但見落日懸扶桑人生富貴何時足
碌碌終當歸北邙

對酒不飲酒應笑豈有再來年少場君看庭前桂花樹
昔如我短今已長但使相過便相飲一任物外雙輪忙
贈王用子 安字明經
王君鬚若綠坡竹爛爛巖電出其目清晨剝啄來叩門
使我高齋眠不熟雲雨相離又十年五經腹笥仍便便
君歸滿貯桑落酒待我來嘲邊孝先

巴東晚泊

欲下吳江棹聊停蜀客船夜長聞擊柝寒逼想衣綿樹
落山山雨林飛處處泉寇公遺廟在松栢尚蒼然

歸州

天寬峽又東地逼郭逾偏屈宋行吟處孫劉戰伐年灘
聲喧墜葉亂石枕飛泉幾度淪歌曲誰家上瀨船

漢隕懷

寥落風塵又一秋無聊仍到酒家樓救貧豈更無長策
多病何當更遠遊巴峽啼猿猶入夢武昌哀雁不勝愁
曉來無限離鄉恨付與長江天際流

黃州

江邊木葉紛紛落天外飛鴻陣陣鳴赤壁已無橫槊氣
黃州尚有洞簫聲

小孤山

讀山詩集

卷四

何年海風刮瀛洲
蓬萊吹落西江頭
青天波蕩鼉鼉吼
黑夜浪撼蛟龍愁
丹崖陡立三千丈
斬絕黃緣莫可上
危亭聳閣誰扶持
蚪木奠花空依傍
昔人以孤言其形
今人以姑實其名
洛神湘妃皆被謗
石湖誠齋同此情
我來正值朔風阻
禱神却不禱神女
山靈點頭旗脚回
占風舟子夜深語

牛渚晚泊

此夜西江月遙懸
北岸雲空憐李太白
不見謝將軍樵
雨緣山出漁歌隔浦聞
燃犀如可照幽族
應當分

天門山

大禹神功費剖鑄
巨靈劈破勢猶連
雙崖拔地兩邊斷
一水穿天萬派懸
日影曉嵐雲外合
風翻寒影浪中圓
何當乘輿披烟霧
直跨峯巒學地仙

登蕪湖城

極目江天客思長
城頭風景最堪望
一江白浪鳴秋雨
兩岸青山話夕陽
出網鮮鱗饒美味
啣蘆過雁落聲長
天涯估客誰云樂
日坐樓船數去檣

無錫縣

初來無錫縣一艇
樹梢橫雪擁春申
澗雲藏泰伯城惟
多沽酒興誰和咏
詩聲只有鄰船笛
聲聲動客情

天寧寺 在嘉興城內

鐘磬出松林沉沉竹院深
半尺洒風雨十日盡
霖霖幾見蛇盤帶空鼠弄琴
支公飛錫在乘輿一相尋

童山詩集卷五

綿州李調元雨村

戊寅

南宋宮詞百首

宮詞者所以紀宮中行樂之詞也而宋自南渡
以來長脚專權大眼喪氣頒下金牌一十二面
偏安王室百五十年其間聞鶴唳而驚心尙何
紫禁巡遊之樂撫攢宮而流涕豈有翠華臨幸
之歡然而天地無情白頭空老河山如故觸目
生愁余在杭所寓第一山卽當年歷聖之三殿

凡鸞輿之所幸多宮掖之轍聞迹者雖湮後來
可鑒因作宮詞百首以補正史三長不無譏刺
微詞半借風謠規戒云爾

表裏湖山畫不如六飛臨幸建炎初蟠空帝闕紅光繞
華蓋雲頭下屬車

元朔朝正各國來景陽鐘罷曉光催百僚鵠立聽宣制
歲聲傳繞殿雷

禮祀青郊瑞腦香樂章初奏珮聲長雲開五輅從天下
點點繁星簇玉皇

樓捲朱簾雉尾開鶴銜恩詔下瑤臺閣門纔見鷄竿立

各路腰鈴報赦來

鳳山行闕鬱青葱聒耳鴉聲入禁中自遣諸兒彈射後
一齊飛去赤崖東

雲邊香裊紫烟輕日午還宮內侍迎不用玉階瞻豹尾
闔門先聽鮑魚聲

曉奉慈皇入翠寒凌虛上壽酒杯寬東風解得君王意
開向醪醕不肯殘

偉觀堂上壺天景德壽宮中賞月時無數女童池上去
白蓮橋畔笛橫吹

臨池太母坐龍舟柔櫓輕搖狎水鷗更道此中宜卧看

芙蓉十里玉塘秋

步捧肩輿盡母歡尋花深殿遶朱欄昨宵曲宴需雲內
親向官家進小冠

每從侍寢檢龍衣半背輕綃淚未晞暗袖金銀示同伴
爭看蝴蝶鬪高飛

鸚鵡來從玉塞旁金牌小字認先皇不知良獄人非舊
猶向籠邊叫卜娘

幙頭院子繡紅巾餽飽明朝捲箔陳何物伶官談丙甲
齊傳聖主赦饗人

節近元宵宴壽皇鼓吹燈火鬧錢塘外間想是年豐稔

細把民情問秀王

艮山門外好遊春玉輦扶來不動塵試捲軟簾偷眼望
一灣新綠上湖濶

生菜頻挑冒曉烟中宮瀾茗賞花天半園柳絮教人拾
特爲春寒作禱氈

柳絲高颭露紅旗幾朶鞦韆畫院垂時有小姬來鬪草
花間笑語伴歸遲

遠信開緘淚已揮使臣方自北邊歸寄來手帕痕猶濕
不忍重開御觀衣

百子池頭御柳黃萬年枝上日初長半窻忽有金鈴響

成鴿遙知是小璫

九重清宴拓朱櫺淨几無塵屏畫屏邊報不來春畫永
自調香墨寫蘭亭

清秋無事獨徘徊內院無人共把杯風月一聯當折簡
橙香酒熟待王來

慈寧慶賞牡丹期正是椒房受冊時舞楊花曲誰歌得
御製新聲作賀儀

香山尊宿上蓮臺共坐肩輿苑夾來向晚金鈴山外振
新從天竺降香回

金簡臨池世鮮窺簪花書法女中師官家閒向劉妃問

何事香名外國知

御床風細靜焚爐鎮日彤庭一事無忽有棋聲花院裏
對彈知是沈姑姑

產閣時儲海馬皮誕辰先遣御醫知明朝宗戚皆爭賀
錢果爭先送洗兒

射堞標竿出水涯翠芳蘭曳岸邊斜年年湖上春三月
常見官家出看花

魚船糝見雜花飛集慶池頭鳳不歸昨日玉顏偷拭淚
無人知是哭閹妃

歷肇宮車錦作圍至尊遙自景靈歸不知多少簪花者

但見紅雲夾輦飛

鳳鳥欣瞻剪霧開未知翠羽幾時回將軍昨揖單于去
親向瑤池奉母來

玉壺午漏響琤琮駘蕩薰風日上春水果浸來香案淨
桐陰小殿讀中庸

羅刹江頭浪走沙北風橫打御舟斜遙傳塞外攢宮至
中使先簪白奈花

三殿優游話大平經筵御罷頌文明侍臣莫進烏鬚藥
白髮蒼顏示老成

玉腕池頭滌硯池花殘侍御寫烏絲微聞閣筆徐生嘆

恨不生同黃米時

秋至深宮玉漏添賣楸聲禪解金錢剪來露葉盈頭揮
無限新涼入髻邊

八月江湖海上生臨江御座與潮平水軍百萬拋沙板
望闕如雷奏喏聲

落葉盈堦夜雨零寒侵翠繡燈圍屏紅鑪獸炭今年少
詔取嚴州鶉鴿青

蠻獅坐設日瞳矐香噴金龍遶殿中別有黃羅擎盒去
齊傳玉食賜東宮

新頒式樣出宮門不許銀牌冒玉津親姊往來原不禁

爲曾進過御前人

老鷓緣何踢弄希未知何事出宮闈
昨朝德壽傳恩詔 速向閩州喚取歸

月夜西窗細按箏 指尖撥出柳梢青
小詞更遣張家製 新樣絲桐奉御聽

穠華幾樹御園新 剪落金盤朶朶勻
捧出外朝人競問 誰能分得紹興春

帝姬嬌小繞廊行 正直傳臚殿上聲
漢國欲招新駙馬 隔屏偷看唱頭名

曉寒睡起黛慵描 緩步牆陰碧草交
一架薔薇扶不起

被風引上綠楊梢

寶墨叢奎四軸餘 驪珠顆顆佩輕裾
內官手裡金絲扇 猶是先皇玉潤書

冰盤釘餽浴蘭時 酒汎菖蒲色色宜
未要門楣懸艾虎 別拈通草刻天師

金殿傳柑綴雪花 絲樓火樹望中斜
宮中遙指鰲燈處 似近司前蔣使家

摘文殿上御經筵 支酒擔冰雋例沿
教問翰林誰宿直 今朝新旨賜餐錢

深宮密坐話昇平 小說閒消永晝清
演史欲聽新曲子

簾前催喚穆書生

彤庭拜禱萬邦臨朝罷還尋墜馬簪聞道金人獻方物

就中奇絕玉觀音

獵獵秋原試放鷹擊來內史翻稜稜南來不見巢生犬

味漱唯推北司能

靜室逍遙著小巾案前競列果肴新皇家最信箕仙事

深夜焚香問小陳

那有餘閑製小詞揮毫偏不費神思宮娥偷得夜來句

盡是唐人集句詩

殿開打麥傍城南臺上觀耕澤遍覃繭館尙書傳內旨

明朝皇后要親蠶

承恩曲院倚紅粧向曉蘇堤看海棠楊柳也如新得寵

向人爭舞綠羅裳

西溪芳草藉輿羞拂帽春光香滿街每過山林除酒稅

肆中便蠹御書牌

誰家紫爛燦星圓軟空籃輿色倍鮮從此宮衣嫌翠領

各人爭戴孟家蟬

日長無事奈愁何睡起含情呵欠多偶見雙鬟相並立

綠紗窻下教鸚哥

月色橫空按綠腰秋堦梧葉總飄蕭舊京式樣都零落

童山詩集 卷五
却唱清歌大海潮

清修尼寺偶焚香原是中宮勅建坊結伴藕花洲畔過
采蓮驚散小鴛鴦

雙隻視朝天未明退回香案內班迎宮娥不識監司職
閑向屏風數姓名

覽鏡雄心未肯低每來角射教塲西未知墜馬傷何處
接骨時聞名小稽

御退宮衣五色兼那堪重覩粉紅衫是誰拾得香羅帕
猶有金龍小印鈐

萬歲山前飛畫鷁百花湖裡弄輕漪曉來春色龍池動

太后乘舟看水嬉

湖上看花駕幸頻天街如洗輦車塵十三門外雷聲動
大內趨迎女聖人

花落徘徊滿院香盡收殘盞作糕糧小姬別製梅花粥
試請君王小盞嘗

草制常教近御床內批捧出詔書黃日長鎖院無宣喚
獨步花陰玉砌旁

鸞綉間引玉津遊恰值青氈祭祀秋說道宓妃今犯戒
更求神像鑄盤溝

楊家妹子最承恩書學官家秀絕倫忽見題成琴鶴句

始知密幄有詩人

電窓窈窕燭花明
蓮漏傳籤報四更
金殿有書忘目痛
親拈玉管錫佳名

挑盡宮燈不肯明
明月斜深院夢無成
翻憐靈鵲知人意
未曉先聞喚起聲

芳陰人醉漏聲遲
花似醺容透玉肌
珠箔半鈎風乍暖
雕梁語燕聽多時

貴主門楣孰敢經
內家餽問不曾停
猶嫌金屋離宮遠
別築樓臺近掖庭

舞鞦輕換步珊珊
齊著金羅照畫欄
忽報蓋官宣已到

大家爭向繡簾看

純鈿供錢樂事寬
朝朝撲戲奉君歡
却憐內侍勤勞久
詔許新辭煖盪官

雙雙宮女駕湖舟
覆額青絲未解羞
忽避人來橋裏去
藕花深處一回頭

輕容側貢會稽紗
組繡年年進內家
染得越綾天水碧
新裁霞帔向人夸

清霽亭前賞木樨
輕敲牙板按歌遲
官家只喜聲聲慢
休唱尋尋覓覓詞

黃閣宣麻日向晨
爲論時事却妃嬪
急傳內侍因何事

直山詩集卷五
要代綸音答使人

逐隊瑤津弄粲初香生菱角襲人裾花間笑博方纔罷
賭得寒光冰玉書

春來紅紫鬪芬芳錦繡亭邊備解忙姊妹邀排挑菜宴
笑看內侍喫生薑

水亭四面碧蓮開避暑隨時翠輦來怪道無人侍執扇
群藏深樹摘青梅

建溪歲貢紫雲團分得龍文御餅圓妃子深宮剛睡起
頻呼小婢汲泉煎

雪香亭畔拭啼痕手握青芝記舊恩銀鑰不收花自落

閒看茗綠上宮門

朝來宮女病恹恹怕見飛光入畫簾記得神仙留寶扇
試教挂去鎮香奩

天廡分棚滾畫毬龜茲樂奏殿東頭繡衣舞動哥舒棒
爭唱紅旗第一籌

龍樓侍寢受恩新花外流鶯款語頻宮女姓名排四季
按時傳喚直班人

臚陳百戲御筵張燦錦亭前月送觴忽召太醫來內殿
官家昨夜飲糖霜

碧琳堂上敞窓櫺龍笛仙音徹內廷偶有松風滿清禁

却嫌絲竹不堪聽

天基佳節滿朝歡上壽仙漿第四盤杖鼓堯鄉纔舞罷
琵琶更教一齊彈

德基圖記失堂東點勘曾經索內宮昨有小官腰下佩
別教收鎖寶函中

教坊賺色內宮傳夢綠華堂按管絃聞有木笳新補放
宣來教唱杏花天

水殿東頭起露臺金蓮隊隊踏蒼苔小姬藏入垂陽裏
忽地拈花笑出來

鴛鴦打散合蟬陳月夜笙歌兩殿開譜出霓裳誰解按

舞來別賜縷金裙

奉詔歸寧鹵簿齊祥曦筵上繡釘梨同時眷屬皆恩賚
孰箇先分翡翠篋

德壽宮姬宣紫詔紅霞帔號遞傳呼就中別有承恩者
不敢分明問玉奴

花枝馬上繡鞍明錦鎧非同舞袖輕知是君王方右武
故教女子亦能兵

曉風吹送輦聲遙隔夜宮粧候早朝新髻盤成不走落
故來隊裡逞嬌嬈

芙蓉並蒂映秋江小妹低闌立一雙纔整歌喉學鶯語

被人傳喚不成腔

一掬河山如錦繡三千玉貌似花叢一朝放出君門去

不忍回頭憶故宮

夏日西湖二首

水光明鏡出山色翠屏開地濕長疑雨天晴乍鼓雷漁

歸深浦去僧帶夕陽回不盡烟霞意偏逢獨自來

西湖佳麗地大半醉紅裙此輩真蛛蟻相歡聚蚋蚊寺

多今代剝碑少古時文惟有孤山頂梅花總不羣

石門道中

崇德片帆過停舟問土風人家桑柘外村市竹林中雪

落遙知鷺霞橫近似虹東吳栖泊久漸已作吳儂

食桃

頗愛味酥如酪掬却憐色嫩着脂融高秋記得貧人食

舊在堂前五樹中

童山詩集卷六

綿州李調元雨村

己卯

偕周尤廷士拔遊龍神堂二首

尤廷德陽縣令周明府際虞次君也明府豐潤
辛酉孝廉與先君同年去歲曾邀余至署為太
夫人書七十壽屏故遣子來謝尤廷尚未弱冠
少余一歲詩文敏捷非凡器也留連數日過遊
南村龍神堂諸寺得詩二首奉贈

禪林何處足堪投除却龍神少可遊花被客蟠根盡出

竹儲人看筍長留不妨對佛同流醞且喜因僧得酒筍
可惜栢松官取盡荒山未便挽賢騶

君家豐潤我羅江萬里相逢意便降敢謂文人今有二
從來國士定無雙翩翩真是佳公子濯濯來過淺陋邦
不是蛩吟無好句龍文已讓鼎先扛

喜唐堯春樂字至

一夜驚雷雨朝來見曉晴故人今日至春水昨宵生燕
試新雛羽鶯啼舊友聲論文吾不愧何必定要盟

閒來

不是閒人不解忙閒來惟恐失春光天晴鸞報楊花落

日午蜂喧菜盡黃事歷安危生古慕交因貴賤起今傷
忙中細檢平生事惟有青山味最長

重至鵲鴿寺

畢竟山中氣味宜重來不覺嘆淒其逢人不解虛心竹
入世多慙衛足葵載酒誰過楊子宅窺園已下仲舒帷
壁間遍覓留題句雨打風飄不記誰

農父詞

負郭幾頃田編茅幾間屋昨宵時雨至流水滿溝澗呼
兒迎晨起且復駕黃犢新苗纔幾日曷土滋長育出門
扶竹看微綠已滿目力作不我負待待秋成熟

青山詩集 卷六
牧童詞

奕世爲農家頗念牛力苦既耕亦且種原上草方膾大
牛穿林去小犢鳴遠浦牽牛浴前溪水淺不及肚馴擾
既可欣相觸亦不怒日暮騎牛歸遙村笛無數

開制軍泰觀風錦江書院賦得四時最好是三月
得三字

韶華傳令序美景恰幽探總計時惟四欣逢月正三芳
菲遲日麗淡蕩晚春含修禊臨江上流杯向洛南紅粧
濃欲褪綠蓋遠初涵柳暗看穿燕桑稠恰飼蠶草薰憐
益母花媚愛宜男遙憶華林宴高吟與正酬

聽呂桂亭林鼓琴歌

瀟瀟桐庭月東出疎榻峭峭風打燭忽然逸韻響東廊
四壁無聲清且肅錦城絲管促繁音琵琶笙笛爭蕩淫
誰將十指朱絲拂一彈頓覺清人心呂子卓犖操風古
焚香爲我按歌譜泠泠梁上欲停雲叟叟松間疑驟雨
忽似高岡鳴鳳凰啾啾百鳥不敢翔又似龍吟水飛立
鼉吼鯨吞皆屏息一聲在高山一聲在流水請君勿再
彈盡善復盡美今夕乍聞君子聲十年躁氣於此平更
欲同君大海去看君瀕洞移我情

初夏病起

道山詩集

卷六

三

一春病過雨方晴徐向新篁竹裏行乳燕出巢飛尚弱
眠蠶食葉輒無聲酒因氣促醉常戒飯為脾虛飽不成
別後仙方如可得欲求思邈學長生

古意

管寧名三龍華歆亦居內白眉名三常馬謖亦復在
論亦難憑忠奸合成隊昆弟無間言賢愚亦未汰覈實
終難蒙虛名究誰蓋所以鍾太傅復生甌與會
偃松無挺枝曲水無直流惟其枝無挺能免斧斤搜惟
其流無直亦少衝決憂嶢嶢故易缺皎皎故易污剛乃
禍之本柔乃生之徒老子五千言此理終不誣

明鏡藏匣中不拭鏡不明燭光照庭內不剪草復生妍
始本有判黑白何難分一旦失明照玉石皆見焚反將
有用器視為勿用論

天地生萬物有一必有二人工造百貨有真必有偽等
是天所生或器或不器等是工所售或貴或不貴物本
足而非價相同而異幽莠與禾齊鷄牛與虎類自非灼
見人罔不互軒輊鄭聲亂雅樂聖言所嘆喟聲樂猶不
妨文章亦此累

庭前一李樹校葉何榮榮下有藤附之相託以為生扶
疎借恩光延蔓及初萌歲久根蒂固梢刺遂縱橫蓬蓬

重山詩集 卷六
出其上朱紫紛相爭李花雖潔白不得如瑰瓊顧爾亦
無悔本鮮則哲明樹竟終不悟枯朽隨飄零吁嗟此足
鑒此樹何重輕

題何愚廬

明禮

調鼎圖

君不見太白漂泊黃河間挂席欲進波連山一朝待詔
金鑾殿御手調羹供奉班又不見世人不識東方朔元
是人間老蝙蝠大隱金門侍玉壺鼎中貯得仙丹籙人
生不遇萼綠華便當勾漏學丹砂修鍊未通三島路烹
調豈到五侯家何人掉頭似巢父琴劍隨身不肯住門
泊萬里槎問君何處去弱水東游是海門沐髮滄海朝

陽盆更欲西行沂河漢直探星宿踰崑崙從茲心不繫
知君百無累展素接混茫忽動滄湘意我亦江湖泛遍
來無緣不得到蓬萊十二瓊樓空悵望三千玉女解徘
徊丈夫不能齷齪取榮供妻子又不能仰看屋梁長如
此何必更遭飛燕讒庶幾去作王母使我思問鼎固知
非君如燮理幾時歸王漿倘惠故人飲佇看茅龍兩兩
飛

送柴豹文

邦直

赴羅江楊明府幕

杜甫客居夔陸游官至蜀陸以獨身來杜兼攜眷屬君
自浙東至館我南村塾絃續東家許住久西隣熟多聞

吾不友直諫我誠服我傲似螳螂君常戒滿覆我鈍如
癡蠅君敏父手速自謂平生歡寧云過相督今君又欲
去何日轉歸轂我聞求宅者固惟隣是卜人生少知己
得一已云足胡為棄若遺殊覺不我穀握手各無言更
盡盃中盞

已卯榜後奉高白雲命偕張翊孟邵姜錫蝦張邦

仲陪閔峙庭周立崖兩座師遊草堂寺卽席賦呈
草堂高宴得追陪郊外從遊笑語開天下詩人歸沈宋
座間名望仰歐梅橙林籠竹叨隅坐食葉銜枚愧不才
怪道錦江秋轉麗滿城桃李正新栽

南星鎮果親王墨松歌

親王畫松有仙骨畢宏韋偃兩超越偶拈墨筆掃青松
百尺霜皮挂東壁蛟螭蟠拏撐碧空雷雨淋漓垂空蒙
屈鐵陰森憂寒月高枝慘烈來悲風平生見畫亦無數
對此恍與精靈遇遙知玉駕駐空山烟雨淒迷得心處
卽今深護碧紗厨憑軒恍若丹青無不須更問元都郭
好去同摹蛺蝶圖

庚辰

岐山縣元日

客路逢元日他鄉長一年春波添潯水曉色入秦川買

音山詩集 卷六
餅家家送門錢戶戶懸故鄉兒女好遙憶拜堂前

平定西域恭紀八首 并序

乾隆乙亥年二月 上命兆惠為將軍富德為

之副討平準噶爾闢地二萬餘里奏凱回朝

執戟登壇總舊勳倚天長劍靖妖氛賜騎近接飛龍廐
分衛遙傳控鶴軍號令六丁驚霹靂指揮八陣走風雲
何須搗穴臨槃木諸部先愁鼓角聞

萬里沙塵積霧收軍門入夜唱涼州前鋒早斷匈奴臂
後寨先懸寡母頭月黑千巖屯虎豹風清萬竈擁貔貅
君王務建梨庭績一破諸臣築室謀

焚巢豈教鳥飛高破竹功成總不勞交趾已騎三象至
單于敢跨六騾逃龍沙夜採于闐玉虎帳晨盤大食刀
莫信虜兒多反覆 神機早自析分毫

試看傳檄定諸番勒石燕然豈更論三箭梢雲驚白狄
一騎踏雪問烏孫狼膏山外無烽火鵬撥河邊有戰魂
須信 天威從日下來瞻北極斗杓尊

大將馳驅荒落邊經營屯戍白山巔農耕蒼嶺三春地
兵過黃河二月天自昔和戎誇魏絳于今出塞笑張騫
貳師不用長征戰早見名王款右賢

櫓槍掃盡暮雲黃日閃旌旗出大荒域外詔歸班定遠

營前爭拜郭汾陽舊閱慣戰青羌卒新看從戎白雲王
從此洗兵臨可跋浩疊音門何必問沙場

寒谷陽回草木舒邊庭喜氣盎春初殊方盡望蟠桃使
降表連收貝葉書苜蓿新看肥塞馬芎藭舊聽憫河魚
投鞍戰士縱橫甚鐵甲行披勇有餘

么膺何異井中蛙蠻觸空爭兩角蝸萬國誰能遲禹會
丸嬰甘自伏堯堦遠來瀚海知稽首歸去流沙識聚骸
今日方欽神武畧書生何事議珠厓

人風渡黃河歌

狂風動地沙如霧行人望見黃河渡轟轟波聲白晝聞

浩浩不息東南去我聞黃河天上來驚濤巨浪相喧歷
迢迢一綫眼中起千里萬里聲如雷曉來北風急如駛
河伯勃怒蛟龍起咆哮直入滄海天日月簸蕩珠宮裏
豈是三時慈嶺雪化為桃花渡頭水我思崑崙山河水
從中開山高二千五百丈九折乃達軒轅臺世無張博
望安知星宿在何隈却笑河上看河人竟欲捧土填孟
津古今事勢亦非一臨淵結網徒艱辛嗟乎安得風息
水亦息我雖不渡渡亦得

鄴中懷古

鼎足還餘魏室基臨漳遺事祇增悲生平欲表將軍墓

重刊言集卷一
死後空留妓女帷
狐嘯芳林烟滿樹
蛙鳴元武雨平池
只今銅雀俱休問
戲馬臺空又幾時

謁楊忠愍公祠 在容城縣白河鉞

孰爲忠愍孰奸邪
同是書生一念差
縱使無文非孔雀
明王元美鈴山罔樂府 誰能有膽當蚺蛇
此時正氣
雀雖有毒不能掩文章
歸遺廟當日香風遍
鎖柳取義成仁男子事
汝曹底事
太咨嗟

張相侯廟 在涿州忠義店

古來名將孰如侯
畢竟還君第一流
姻婭君臣同故里
姓名叱咤壯千秋
必逢漢賊方瞋目
既遇將軍肯斫頭

若比中興圖畫像
雲臺諸宿盡無儔

滄州署中和同年檢討張鶴林 見懷元韻

乍見鴻書眼倍明
開緘已屆月嘉平
人如晚菊霜能做
詩似寒梅雪妬清
欲問舊遊千里隔
初來新地百愁生
錦城記得同歡處
共上華筵賦鹿鳴

戚繼光燕山紀功碑歌 在密雲縣北門外八蜡廟
文爲兵侍汪道昆所撰

檀州城東八蜡廟
十面穹碑倚山嶠
稜稜兩座峙階楹
蠹蟲一綫當邊徼
當年誰此勒奇勲
居民指說戚將軍
坐營家法朝中少
殲倭雄聲海內聞
憶昨俺荅初通貢
上蠻十萬聞弦控
將軍新自海邊來
意氣不與單于共

朝廷方重薊門兵萬壘龍旗耀日明炬點篋筦操馬器
雷聲輕轢走車營是時天子方倚畀十六年中靜無事
密雲聲勢冠諸邊司馬鴻文留姓字一自旄麾嶺上游
轅門舊卒皆白頭不聞西域留任尙却憶東吳守陸侯
卽今人去高山隕將軍大樹飄零盡無復貔貅重野宿
空餘樵牧驚殘盾我來不禁日摩挲剩欲拋書請荷戈
旁人撫掌輒相笑壯志功名奈老何

密雲縣省親以出口未見住大悲菴次日回京

禮少趨庭過騎因定省乘不知先出口空自撫愁膺帶
想十圍滅城看百堵興悵然却歸去負米竟何曾

時修密雲

城工已竣

聞張雲谷病

見說侵晨尙卧帷司閣謝客據常規未能饋藥慙康子
莫便援歌拒孺悲雞肋一官同此日鴈書千里到何時
從來別駕皆聊借莫遣安仁兩鬢絲

時借補光州判

寄懷王心齋補一同年時檢發安徽心齋江寧人

霜天木落正冬初偶向天南賦索居只怪甫離千里遠
如何不寄一行書同寮應有膠投漆大吏能如水得魚
更喜金陵故鄉地歸家只用半帆餘

比部孟鷺洲同年用張鶴林見懷韻寄示再和答之

重山言集卷六
同輿憶昔赴春明豈料今爲國決平自分蒹葭難並倚
相形玉樹本來清升沉未必真前定資格旋成老後生
看取明年腰下劍雌雄仍共匣中鳴

夜雨

晚雨飄蕭陣陣涼驚聞風樹擺琳瑯一窗燈火飛蟻撲
幾點芹泥乳燕忙急遣兒童收畫局愁看客子攬衣裳
寒天束手渾無事獨向高天數雁行

雨

日色催晴風色慳天公醞釀作愁顏前村雨樹濃於墨
一幅堆雲大米山

和傅中丞巖溪栢臺種栢韻二首

登臺領繡衣丰采老堪愛稜稜執法時觸邪真似豸閑
來坐南榻風流緬前輩古栢森成林羣鳥朝夕會霜皮
溜白雨老幹聳青翠勢參雲霄表風生臺閣內有時滋
秋聲匝地發奇籟以此樹百年無繼吁可怪歸來謀種
栢幸有老成在

先生栢作心推折諒不能邇來手種栢一一虬龍騰我
聞古遺直獨坐稱中丞埋輪與折檻沒則爲神靈卽看
青銅柯沃雪益以貞豈非百怪護晝夜守霜廳但使高
節彰坐嘯亦有情烏棲定何處夔龍今在廷他年應

音山詩集 卷一
有客摩挲新栢庭

七夕篇

絳河清淺秋如練錦棚瓜果羅清燕垂蘇帳裏夜相邀
穿鍼樓上年相見此夕深閨陳瑾瑜此時小闕尋蜘蛛
飛雁月斜度銀漢流螢夜靜輝金鋪就中別有傷心妹
思夫遠戍龍沙碧五色雲霞剪不成三更風露寒難拜
天南天北鎮相望誰惜今宵乞巧忙隔窻戲遣鸚呼侶
捲幔愁看鵲作梁雙星渡河會何處美人獨立頻遲顧
緱氏山頭人未還銀洲界外軍方駐轉瞬闌干北斗低
雞聲爭向汝南啼最憐挂布阮家子亦似停機竇氏妻

安肅道中

霏霏小雨麥初黃撲鼻風傳餅餌香村巷誰家倉庾滿
空餘碌碡卧斜陽

垂楊蓋路草平堤帽影鞭絲襯馬蹄深巷閉門人正倦
酒旗飄出小橋西

慈航寺贈無本上人 寺扁爲方問亭制軍所題

禪房門對石橋開滿徑槐陰冒綠苔名寺必須名筆額
後僧偏拒後人來千家野色沙邊迥一片河聲樹裏迴
正擬聽他齋後懺與人告我夕陽催

松林題壁

濕路惺忪雨遮山澹浚雲東西菴未到大小徑先分有意鳥相喚無心樹已焚入門吾已悔求懺不須云

琉璃河


油油綠岸長菰蔣野外風收估客檣却憶石湖橋畔
琉璃河下看鴛鴦

孤雁行

為涿州伯吳鳳者節母太夫人作

南來孤雁何嗷嗷白雲叫斷霜天高人間隻影誰不有
孤雁一鳴自搔首當年節母守空閨月冷風淒志不輸
一自青年破鸞夢頓令白首如鴻孤當年本欲殉夫死
未了其如腹中子淚洒黃泉指此心翠栢青松誓終始

從此日奉舅姑魚小雛呀呀能讀書子既成名孫成列
四十年來如電掣錦堂春晝開瓊觴猶對華筵淚嗚咽
朝來忽見孤雁翔口內不言心自傷雁乎雁乎吾語汝
切勿重叙從前苦錫爾誥命旌爾貞世間孤雁誰及汝



真山言本之卷

